

BAN CONHUNTAMENTE ANALISA TELE ARUBA NOBO

Tele Aruba ya caba a pasa tur pruebanan y alavez tur beneficianan di duda, pero poco ta e cambionan cu por ser nota entre e Tele Aruba biew y esun nobo. Nos ta kere den e inteligencia y conocimiento di señor ing. Roland Croes y nos sa tambe su capacidad pa a dirigi tur e negosacionnan cu a haci cu awe Setar NV ta doño di Cable TV y Tele Aruba. Cu otro palabra Setar NV ta dominando un gran parti di e medio audio visual di nos pais. Un poder absoluto ariba e tereno aki.

Un ambicion cu a bira realidad, pero cu ta trece cune tambe cierto responsabilidadnan, cu no ta keda simplemente na negosacionnan exitoso, pero cu mester tin como resultado su afectonan profesional. Aruba no ta un simpel pais mas, pero ta un pais accesible na medionan di comunicacion internacional.

Anto aki ta na unda comparacionnan ta bin padilanti, pasobra pueblo ta cuminsa pa compara. Tempo cu ATV a bin hopi tabata e comparacionnan y esaki a yuda pa a drecha cierto programa, cierto productonan. ATV a haci algo hopi bon, esta di a manda cierto personanan pa nan por a sigui cursonan na nada menos cu na Merca, mientras cu a bin expertonan ariba diferente terenonan pa a duna cursonan aki na Aruba mes.

Di tin equiponan moderno no ta tur cos, pero ta esnan cu tin cu maneha nan ta importante. Nos ta kere cu e empleadonan mester a sigui un curso den exterior o expertonan mester a bin pa a guia e empleadonan.

No ta bon pa hisa un persona y pone na un posicion cu e no ta prepara pe, pero ta mihor prepare prome y esaki ta yuda cu e por eherce su trabow cu mucho mas seguridad. Un persona cu no ta prepara pa haci, eherce un funcion, por conoce tambe un colapso pa resto di su bida, pa no bisa un fracaso.

Mucho cambio pueblo no a nota ainda, principalmente pa loke ta trata e

programanan, cu ainda ta bai hopi den repeticion. E promonan tin nos como televidentenan bastante cansa, na otro canalnan bo ta mira cierto promonan pa e programanan ta tuma lugar, pero ta ser nara pa un persona cu un boz profesional. Corda ora cu bo mira demasiado promonan di cierto programanan, esaki por trece cune cu nan ta bira hopi aburido y hasta kizas bo no ta haya gana pa mira nan.

Nos ta kere cu ningun canal di television den nos pais tin materialnan suficiente pa haci un transmission henter un dia. Na Hulanda mes ta cierto oranan e canalnan oficial tabata funciona, awor nan a cambia.

Nos ta kere cu Tele Aruba mester cuminsa atardi, pa banda di 4'or y dedica na programanan pa mucha cu tin metanan informativo. Por tin hasta guianan con pa haci huiswerk etc. Motiva hobennan pa nan leza mas, siña nan cuida nan djentenan, haci bon uso di cosnan di hunga, con pa come adecuadamente, domina nan miedonan, siña nan papia papiamento bon, organiza weganan entre e skolnan etc. Ta keda na fantasia di e productor pa traha programanan cu por yuda den e desaroyo di e mucha. Produci programanan educativo y informativo. Novela na un ora asina tempran no ta un mihor forma pa educa nos hobennan. Novela mester ser pasa despues di noticia. Competi cu otro canalnan cu tambe ta presenta novela. E parti cu cada biaha ta pasa e nomber RCN, mester ser corta, tur caminda di mundo nan ta pasa novelanan graba den otro paisnan, pero nan no ta promociona e canal en cuestion, pero ta kita esaki afor. Ora cu bo wak e telenovela bo ta haya e pensamiento cu ta RCN bo ta mirando, aki mester haci un trabow edicion (editorwork) mihor.

Noticia mester tin su orario exacto, esta si ta un ora, anto e mester cuminsa y caba na e ora stipula.

No lubida cu e parti spiritual ta hopi importante y necesario, e mester ta bon coordina, esaki ta trece e fortaleza pa

tanto e trahadornan mes como e pueblo di Aruba en general. Nos pueblo mester por bira mas spiritual, especialmente cu mundo ta pasando den momentonan sumamente dificil.

Cu tanto programanan nobo ta duele pa mira cu no tin comercio interesa pa nos propio television. Na otro lugarnan nan ta organiza anualmente pre-benta, pa interesa e comerciantenan pa nan pone nan avisonan den cierto programanan.

Tambe por establece cierto fundacionnan, na unda televidentenan ta bira miembro, cu e meta pa cubri gastonan di e programacion y e orario di transmission. Otro paisnan tin hopi fundacionnan asina cu ta percura pa cierto programanan di television wordo traha.

Di otro banda nos ta kere cu otro companianan di Gobierno tambe tin e derecho y deber pa contribui pa mantene un compania estatal di un pais. Nos ta kere cu tanto WEB, ELMAR, APA y otronan por yuda cu programanan di concientisacion di nos pais. Nan mester por tin nan contribucion mensualmente, na unda profesionalnan lo ser contracta pa dirigi cierto programanan.

Nos ta kere cu Tele Aruba tin futuro, pero siguramente mester bin mihor planificacion den tur sentido di palabra, sino e ta bai den mes un direccion cu nos a conoce pa 40 año largo, especialmente na unda e palo di watapana ta bin constatemente ariba pantaya. E programanan mester tin continuacion, esta cu un programa ta bai den otro.

Nos di Entre Nos a ofrece gerente di Tele Aruba, pa yuda cu cierto trahadornan por sigui un curso tanto na Venezuela o Colombia.

Un punto hopi importante ta nos idioma y cu sigur mester wordo domina na e mihor forma. Un curso di papiamento ta hopi necesario.

Tele Aruba ta di bo tambe y ta pesey nos ta spera cu nos recomendacion lo ser tuma na consideracion. ■